

UHABAKHUKHI

1 Isiqalekiso esemukelwa
nguHabakhukhi umphrofethi.

Insolo KaHabakhukhi

² Koze kube nini, awu Jehova,
ngicela usizo,
kodwa ungalaleli na?
Loba ngimemezela kuwe ngisithi,
“Udlakela!”
kodwa ungangihlengi na?
³ Kungani ungitshengisa
okungasimfanelo na?
Kungani ubekezelela okungalunganga
na?
Ukuchitheka lodlakela kuphambi
kwami;
kulokulwa, lengxabano yandile.
⁴ Ngakho umthetho usuthundubezekile,
lokulunga akusabi khona.
Ababi baminyezela abalungileyo ukuze
ukulunga konakaliswe.

Impendulo KaJehova

⁵ “Khangalani ezizweni libone
njalo limangale kakhulu.
Ngoba ezinsukwini zenu ngizakwenza
into elingeke liyikholwe,
lanxa lingabe litsheliwe.
⁶ Sengivusa amaKhaledi,
lesiya isizwe esilesihluku lamawala,
esitshangaza umhlaba wonke
ukuyathumba izindawo zokuhlala
ezingasizo zaso.
⁷ Bayisizwe esesabekayo lesitshayisa
uvalo;
bangumthetho bona ngokwabo
njalo baziphakamisa udumo lwabo.
⁸ Amabhiza abo alesiqubu esedlula
esezingwe, ayesabeka kulezimpisi
kusihlwa.
Amabhiza abo empi amatha

ephulukundlela, abagadi bawo
amabhiza bavela khatshana.
Bandiza njengamanqe ehwitha ukudla,
⁹ bonke beza belande udlakela.
Amaxuku abo aqhubekela phambili
njengomoya wasenkangala
abuthe abathunjiweyo njengenhlabathi.
¹⁰ Baklolodela amakhosi,
bahleke ababusi usulu.
Wonke amadolobho avikelweyo
bayawahleka;
bakha amadundulu ngenhlabathi
bawathumbe lawo madolobho.
¹¹ Emva kwalokho badlula ngesiqubu
njengomoya baqhubeke – abantu
abalecala abamandla abo
angukulunkulu wabo.”

Insolo Yesibili KaHabakhukhi

¹² Awu Jehova, kawuveli phakade na?
Nkulunkulu wami,
Ngcwele wami, kasiyikufa.
Awu Jehova, ubabekile ukuba
bahlulele.
Awu Dwala, ubamisile
ukuba bajezise.
¹³ Amehlo akho ahlanzeke kakhulu
ukuba akhangele okubi;
awungeke ubekezelele
okungalunganga.
Pho kungani ubekezelela abachithayo
na?
Uthulelani lapho ababi beqeda labo
abalunge kakhulu kulabo na?
¹⁴ Wenze abantu bafana lenhlanzi
olwandle,
njengezidalwa zazolwandle
ezingelambusi.
¹⁵ Isitha esibi siyazikhupha zonke
ngewuka,
siyazibamba ngembule laso,
sizibuthele embuleni laso
elidonswayo;
ngalokho siyajabula sithokoze.
¹⁶ Ngakho-ke senzela imbule laso
umhlatshelo,

sitshisele imbule laso elidonswayo
 impepha
 ngoba ngenxa yembule laso
 sithe pekle phakathi
 kwenotho,
 sizitika ngokudla okumnandi.

¹⁷ Kuzamele siqhubeke sithulula umbule
 waso,
 sitshabalalisa izizwe kungekho
 sihawu na?

2 Ngizakuma esilindweni sami

ngime phezu komthangala;
 ngizakhangela ukuba ngibone ukuthi
 uzakuthini kimi,
 lokuthi yimpendulo bani engizayitsho
 ngale insolo.

Impendulo KaJehova

² UJehova waphendula wathi:

“Loba phansi isibonakaliso
 usenze sicace ezicecedwini
 ukuze isigijimi sigijime laso.

³ Ngoba isibonakaliso silindela isikhathi
 esimisiweyo;
 sikhuluma ngesiphetho
 njalo kasiyikuba ngamanga.
 Lanxa siphuza, silindele;
 sizafika impela njalo kasiyikuphuza.

⁴ “Khangela, uyazigqaja;
 izifiso zakhe kazilunganga –
 kodwa olungileyo
 uzaphila ngokholo lwakhe.

⁵ Impela iwayini liyamkhohlisa;
 uyazikhukhumeza njalo kalakho
 ukuphumula.
 Ngoba uyisihwaba njengengcwaba,
 njalo kasuthi njengokufa,
 ubuthelela izizwe zonke kuye
 athumbe labantu bonke.

⁶ “Bonke kabayikumchothoza na
 bamhleke besithi, “ ‘Maye kulowo
 obuthelela impahla zokwebiwa

azinothise ngobugebenga!

Koze kube nini lokhu kusenzakala na?’

⁷ Labo olezikwelede kubo

kabayikukujuma na?

Kabayikuvuka bakuthuthumelise na?

Lapho-ke uzakuba yinto yabo

yokuhlutshwa.

⁸ Ngoba sewaphanga izizwe ezinengi,

abantu abaseleyo bazakuphanga

ngoba wachitha igazi labantu;

watshabalalisa amazwe lamadolobho

labo bonke abakuwo.

⁹ “Maye kulowo obumba umbuso

ngenzuzo embi

ukuba akhele isidleke sakhe phezulu

ukuba abalekele ukuwelwa yingozi!

¹⁰ Ucebe ukubhujiswa kwabantu

abanengi,

wayangisa indlu yakho,

walahlekelwa yikuphila kwakho.

¹¹ Amatshe omduli azakhala

imijabo yamapulanka izasabela.

¹² “Maye kulowo owakha idolobho

ngokuchitha igazi

akhe umuzi ngobudlwangudlwangu.

¹³ UJehova uSomandla kakumisanga na

ukuthi umsebenzi uzinkuni zomlilo

nje kuphela,

lokuthi izizwe ziqeda amandla azo

ngeze?

¹⁴ Ngoba umhlaba uzagcwala ngokwazi

udumo lukaJehova,

njengamanzi agcwalise ulwandle.

¹⁵ Maye kulowo onika omakhelwane

bakhe okunathwayo

ekuthulula esigujini sewayini

badakwe,

ukuze akhangele imizimba yabo

enqunu.

¹⁶ Uzakuba lehlazo elikhulu endaweni

yodumo.

Khathesi sekulithuba lakho!

Natha uchayeke.

Inkezo yesandla sokunene kaJehova

- iyeza kuwe,
 ihlazo lizamboza udumo lwakho.
¹⁷Udlakela olwenze eLebhanoni
 luzakuqeda amandla,
 lokubulala kwakho izinyamazana
 kuzakuthumelisa.
 Ngoba uchithe igazi labantu;
 uchithe amazwe lamadolobho labo
 bonke abakuwo.
- ¹⁸Silosizo bani isithombe njengoba
 sibazwe ngumuntu?
 Kumbe isifanekiso esifundisa amanga?
 Ngoba lowo osenzayo uthemba
 isidalwa sakhe;
 wenza izithombe ezingeke zikhulume.
- ¹⁹Maye kulowo othi esigodweni,
 ‘Vuka uphile!’ loba athi elitsheni
 elingaphiliyo, ‘Phaphama!’
 Linganika iseluleko na?
 Lembeswe ngegolide langesiliva,
 akulamphefumulo phakathi kwalo.
- ²⁰Kodwa uJehova usethempelini lakhe
 elingewele;
 umhlaba wonke kawuthule phambi
 kwakhe.”

Umkhuleko KaHabakhukhi

3 Umkhuleko kaHabakhukhi
 umphrofethi. NgeShigiyonothi.

- ²Jehova, ngizwile ngodumo lwakho;
 ngiyazesaba izenzo zakho,
 awu Jehova.
 Zivuselele ezinsukwini zethu,
 yenza zazakale esikhathini sethu;
 ekuthukutheleni khumbula isihawu.
- ³UNkulunkulu wavela eThemani,
 oNgcwele wavela eNtabeni iPharani.
 Inkazimulo yakhe yasibekela amazulu
 lokudunyiswa kwakhe kwagcwala
 umhlaba wonke.
- ⁴Ubucwazicwazi bakhe
 babunjengokuphuma kwelanga;
 imisebe yaphazima esandleni sakhe

- lapho amandla akhe ayefihlwe khona.
⁵Isifo sahamba phambi kwakhe,
 umkhuhlane walandela amanyathelo
 akhe.
- ⁶Wasukuma, wanyikinya umhlaba;
 wakhangelana,
 waqhaqhazelisa izizwe.
 Izintaba zasendulo zabhidlika
 lamaqaqa akudala adilika.
 Izindlela zakhe ngezanini lanini.
- ⁷Ngabona amathente aseKhushani
 ephakathi kosizi,
 lezindawo zokuhlala zaseMidiyani
 zisebuhlungwini.
- ⁸Awu Jehova, imifula
 wawuyithukuthelele na?
 Ulaka lwakho lwavuthela izifula na?
 Ulwandle wawuluthukuthelele na
 lapho wawugade amabhiza akho
 lezinqola zakho zempi ezinqobayo?
- ⁹Idandili lakho ulembule, ufune
 imitshoko eminengi.
 Uqhekeze umhlaba ngemifula;
- ¹⁰izintaba zakubona zajanqula,
 izikhukhula zamanzi zedlula,
 ulwandle lwahlokoma,
 lwaphakamisela amagagasi alo
 phezulu.
- ¹¹Ilanga lenyanga kwema mpo
 emazulwini ekubenyazeleni
 kwemitshoko yakho entwezayo,
 ekuphazimeni kwemitshoko yakho
 ecazimulayo.
- ¹²Wanyathela umhlaba ngolaka,
 wabhula izizwe ngentukuthelo.
- ¹³Waphuma ukuba ukhulule abantu
 bakho,
 ukuba usindise ogcotshiweyo wakho.
 Umkhokheli welizwe lobubi
 umchobozile,
 wamebula kusukela ekhanda kusiya
 enyaweni.
- ¹⁴Umhlabe ikhanda ngomkhonto wakhe

lapho amabutho akhe ephume
 ngesiqubu ukuba asihlakaze,
 ethokoza kungani asezakudla
 izihlupheki ezazicatshile.

¹⁵Wanyathela ulwandle ngamabhiza
 akho,
 uqubula amanzi amanengi.

¹⁶Ngezwa, inhliziyo yami yatshaya,
 izindebe zami zabikizeliswa
 ngumsindo;
 amathambo ami angenwa yikubola,
 imilenze yami yaqhaqhazela.
 Kodwa ngizalindela ngesineke
 usuku lomonakalo ukuba
 lufike esizweni
 esihlasela esethu.

¹⁷Lanxa isihlahla somkhiwa
 singanunkuli
 lamavini engekho
 emivinini;
 lanxa ama-oliva engathelanga,
 lamasimu engabanga lokudla,
 lanxa kungelazimvu esibayeni
 lenkomo zingekho ezitebeleni,
¹⁸kodwa ngizathokoza kuJehova,
 ngizajabula kuJehova uMsindisi
 wami.

¹⁹UJehova Wobukhosi ungamandla ami;
 wenza izinyawo zami zibe
 njengezempala,
 ungenza ngihambe
 ezindaweni eziphakemeyo.

Ngeyomqondisi womculo.
 Ezigincini zami.